



*Kamis, 13 Oktober 2022*  
**Ogen: 1 Samuel 1:1-8**



Penina Ras Hanna



**L**a lit jelma si sempurna. Tapi engkai maka lit denga jelma si nokoh man jelma sideban, tempa sikapen ia ras joren kecibalna seh maka melasang ia man kalak sideban. Setiap jelma tubuh ku doni enda lit kekurangan lit ka kelebihenna. Jadi situhuna labo banci meganjang ukurta si cedai ukur kalak perban sikapen si akap kita. Bas ogenta enda ituduhkan banta kerna dua kalak si man pandang-pandangenta. Eme si Penina ras si Hanna.

Duana kalak enda eme ndehara si Elkana. Penina lit anakna, tapi Hanna lang, emaka bas perbagin pangan buen man Penina ras anak-anakna. Perban si e megombang ia man Hanna, rusur isaling-salingkenna Hanna perban kekurangenna, janah e ertahun-tahun ibahanna ceda ukur kiduana. Si Hanna tertekan rusur perban lalap la lit pupusna tambah kiduana si mpesega-sega ia. Sikap Hanna enda erbahanca maka hubungenna ras perbulangenna pe terganggu, pengerganna pe kerna dirina jadi urak, erkiteken lanai nggit ia man, lanai keleng atena bana. Tapi lit si membedakan Hanna ras Penina, Hanna tetap erpengarapen man Tuhan.

Kita banci mela, banci rendah diri adi lit kekurangenta, tapi erlajar kita arah Hana, larut ku bas perbeben erbahanca kote. Tapi nggeluh erpengarapen mabai kita ermeriah ukur. Ijapa pe mbue nge biak si bagi Penina, over percaya diri ras seleh mpeteruk kalak si deban. Uga cara ngalaken kalak si bage, ula begiken katana, fokus ku bas pengembangan dirinta. Kelemahenta bahan jadi motivasinta gelah ertutusna ngerembakken diri man Tuhan. Tuhan labo nepa kita alu sembarang, kita itepaNa unik ras terencana. Kelemahenta eme gegehta, batu loncatenta meteh ras ngaloken sura-sura Tuhan si mehuli banta. Teklah kerina meherga i lebe-lebe Dibata.